



Gnovis ideis par une gnove autonomie

Ise pardabon in pericol la specialitât de nestre regjon? Ce si puedial fâ par difindile o par rignuvîle? E cu la globalizazion, aial ancjemò sens fevelâ di autonomie? Dopo i politics, lis ideis dai cjâfs che a pensin (e a pesin) dal nestri Friûl.

CRISTIANA COMPAGNO RETORE DE UNIVERSITÂT DAL FRIÛL

"Il Friûl sieraie dal arc macro regjonâl dal Alt Adriatic"

Tai ultins timps si fevele simpri plui dispès di eliminâ lis regions a statût speciâl, cjapade dentri la nestre. Isal un riscli concret?

Il pericol al è e al è reâl ancje se in chescj ultins mès lis prioritâts dal País a somein altris. Diversis Regions a statût ordenari e ancje di un ciert pès demografic e politic, a àn plui voltis manifestât contrarietât al intignâsi di cheste diferenciacion di tratament. Secont tancj, cun di plui, il federalisim fiscâl, aumentant lis competencis des regions e la cuote di risoris di chestis stratignudis par incressi e miorâ i servizis relatîfs, al tirarès a omogeneizâ di fat lis situacions regjonâls e a fâ diventâ duncje obsolet un tratament "speciâl" par cierts di chestis.

Sono cambiadis vuê lis resons de nestre specialitât?

Dal sigûr! Lis resons de nestre specialitât a son cambiadis in particulâr par ce che al tocje il nestri rûl internazionâl. Vignude mancul la "curtine di fier" e cu la Europe slargjate, no son plui lis resons che a motivavin la specialitât pai fins de gjestion des delicadîs cuistions che a derivin de esistence di un confin massime cjalt.

Podarressial il plurilinguism jessi la fonde de nestre gnove specialitât?

No crôt che il plurilinguism al sedi vonde a fondâ une gnove specialitât. Intune Europe des diversitâts, ancje culturâls e linguistichis, la esistence di une regjon cun plui len-

ghis e culturis al è un pont di partence impuartant ma o crôt no tât di motivâ un regjim di autonomie particulâr.

Se no, quale podarressie jessi?

Il nestri compit strategic al è vuê chel di fâ di sieraie dal arc macro-regjonâl dal Alt Adriatic. I sta a cheste regjon di "rezi" in maniere strutturâl chest arc costruint, o miôr completant e metint a regjim un sisteme portuâl, interportuâl e produtîf - che al va di Ravenna a Flum ma che nô o sin la part centrâl - bon di colegâ il Mediterani di jevât aes areis plui produtivis di Europe. Cheste e je vuê la nestre mission strategiche e cheste e à di diventâ ancje une vision articolade in politicis che a domandin ancjemò specialitât e autonomie di azion.

Abolizion des Provinciis e dai piçui comuns: isal il riscli di cambiâi la muse a une regjon come la nestre che e à trasformât lis diferencis intun pont di fuarce?

Il teme al è dificil è al va frontât cun calme e sintiment par evitâ demagogjiis facilis tant che difindi a oltrancè situacions che no si puedin difindi. I problemis grâfs che o vin denant nus fasin intraviodi un senari prospetiv dulà che il teritori al varâ di jessi guviernât di Ents di aree largje che a varan di nassi soreddut de agregazion di plui Commons. Chest nol gjave che si vedi di cjatâ un mût par difindi la coesion e lis identitâts ancje al nivel micro. La situazion des Provinciis in cheste regjon e je tant disecui-

brade e cuasi paradossâl: di une bande une Provincie grande tant che chê di Udin che, in cualchi moments, e somee cuasi in competizion cu la Regjon ma che, no vint ni i podès e nancje la fuarce finanziarie, e finis cence fal par vè pal plui un rûl di testimoneance. Di chê altre, chê di Triest che e pâr un cuintrisens intune realtât che e podarès jessi guviernade di une uniche "citàt metropolitana". Gurize e Pordenon a somein plui justis a un rûl di guvier di aree largje.

La Regjon fasie avonde par valorizâ la specialitât dal Friûl Vignesia Julie? Podarressie fâ di plui?

Prime di dut o varessin duj di convincisi che cul solit drandran aromai no si va di nissune bande. A coventin visions gnovis e fuartis ma concretis, no ilusoriis ma nancje spauriôsiss viers il stât e i guviers nazionâi. O crôt che la Regjon e sedi ancjemò dâur a cirf des motivacions di une gnove specialitât ma o pensî ancje si sedi scomençât a colocâ cierts tassei impuartants di cheste gnove vision. O pensî, par esempli, ai avanzaments fats a pet di un teme, tant che chel dal as Adriatic-Baltic, che, fin a pòcs agns indaûr, pòcs (e la nestre Universitàt tra chescj) a fevelavin.

Puedie la specialitât zovànus intune situazion di crisi economice come chê che o stin passant? Cemût?

Dal sigûr, par esempli, mostrant



che o podin gjesti miôr di altris servizis impuartants ma ancje creant kundizions e cjapant oportunitât pal rilanc dal svilup che, dal centri, nol sarès mai pussibil fâ.

Cuntune globalizazion simpri plui prepotente, isal ancjemò puest pes autonomiis?

Il miôr pinsîr su la globalizazion nol dinee lis diversitâts e nancje lis autonomiis che anzit a van no dome difindudis ma ancje rinfuarçadis tant che anticuarps essenziâi cuintri lis derivis e i slaes produsûts de stesse globalizazion cemût che o sin daûr a viodi cu lis consecuençis, cussì lungjis e dra-

matichis, de crisi finanziarie. Al baste che, purpûr lis Autonomiis a sedin ativis, atentis e buinis di costruî aleancis e cooperacions plui amplis.

Cemût isal destinât a mudâ il nestri mût di vivi?

In chest moment al è dificil fâ previsioni di chest gjenar. O sin daûr a passâ une turbolence tant fuart che e met in grande evidence dutis lis nestris debilecis storichis pitost che i ponts di fuarce. Si pues ciert saltâ fûr rinovâts e miorâts ma dome se o savaîn ridimensionâ almancul cierts des nestris debilecis storichis.